

# **Yudanza Fo'i Ariba**



## YUDANZA FO'I ARIBA

“YUDANZA FO'I ARIBA” ta un coleccion di textnan di Escritura, scogí segun tema fo'i varios parti dje Bijbel. Mi ta kere cu e comentario di mas bon p'e Scrituranan, ta e Bijbel mes.

Dios Su Palabra ta bini “fo'i ariba” y en berdad tin mashá hopi yudanza pa curazonnan cu tin hamber y sed pa husticia. Ora un hende ta ripinti, ta rechaza picá, y ta kere cu tur su curazon cu Señor Jesu-Cristo ta su Salvador, e ora ey, Señor lo manifesta Su mes na né y parti Su mes gozo y paz cu e creyente. Mi a experimenta esaki na 1937, y fo'i e dia ey, nunca mi a kibra e comunión maravioso aki cu Señor. Mi ta rogábo pa duna bo mes na Cristo, y acept'Ele como bo Salvador y Señor. Hacié awor, si ainda bo no a hacié caba.

— Watson Goodman (1920-2002)

# AMOR DI DIOS

## Romanonan 5:8

Ma Dios ta confirma Su amor na nos, pasobra tempu nos tabata pecador ainda, Cristo a muri pa nos.

## San Juan 13:1

Y promé cu fiesta di Pascu, Jesus tabata sabi cu Su ora a yega pa E pasa fo'i e mundu aki na e Tata. Y manera El a stima esunnan di djE cu tabata den mundu, asina El a stima nan te na fin.

## San Juan 3:16

Pasobra Dios a stima mundu asina tantu cu El a duna Su unico Yiu, pa tur cu kere den djE, no bai perdí, ma haña bida eternu.

## Rebelacion 1:5

Y di Jesu-Cristo, cu ta e Testigu fiel, e primogenito fo'i e mortonan, y e Principe dje reynan di tera. Na E cu a stima nos y a laba nos di nos picánan den Su sanger.

## Jeremias 31:3

Ya pa hopi tempu, Jehová a manifesta Su mes na mi bisando: Sí, Mi a stima boso cu stimacion eternu; p'esey cu misericordia y bondad Mi a hala boso.

## DIVINIDAD DI JESU-CRISTO

1 Timoteo 3:16

Y sin cuestion, e misterio di debocion ta grandi: El a wordu manifestá den carni, a wordu hustificá den Spiritu, a wordu mirá pa angelnan, a wordu predicá den e nacionnan, den mundu nan a kere den djE y El a wordu ricibí ariba den gloria.

San Mateo 1:22,23

Tur e cosnan aki a sosode pa wordu cumpli loke Señor a papia pa medio dje profeta cu a bisa: Ata, un birgin lo wordu embarazá y lo é duna luz na un yiu homber, y lo é yama Su nomber, Emanuel, cu traducí ke bisa: Dios cu nos.

San Juan 14:9,10a

Jesus a bis'é: Tantu tempu largu cu Mi ta cu boso y bo no conocéMi ainda, Felipi? Esun cu a miráMi, esey a mira e Tata, y con bo ta bisa: Munstra nos e Tata? Bo no ta kere cu Mi ta den e Tata y e Tata den Mi?

San Juan 1:1 y 14

Na principio tabata e Palabra, y e Palabra tabata cu Dios y e Palabra tabata Dios. . . y e Palabra a bira carni y a biba meimei di nos y nos a mira Su gloria, un gloria como dje unico Yiu dje Tata, yen di gracia y berdad.

## JESUS, E YIU DI DIOS

1 Juan 4:14,15

Y nos a mira y ta duna testimonio, cu e Tata a manda Su Yiu pa ser Salvador di mundu Asina, ken cu confesa cu Jesus ta Yiu di Dios Dios ta permanece den djé, y é den Dios.

Colosensenan 2:9,10

Pasobra den djE (Cristo Jesus) ta biba corporalmente e perfeccion completu dje Divinidad. Y boso ta completu den djE, cu ta e cabez di tur potencia y poder.

Isaias 9:6

Na nos un Yiu ta nací, na nos un Yiu homber ta duná, y e gobierno lo ta riba Su schouder; y Su nomber lo ta yamá: Maravioso, Consehador, Dios Poderoso, e Tata eternal, e Prins di Paz.

San Lucas 1:35

Y e angel a rospend'é: E Spiritu Santu lo bini riba bo, y e poder dje Haltisimo lo sombrá-bo; p'esey tambe e Santu cu lo nace fo'i bo, lo wordu yamá: Yiu di Dios.

San Mateo 17:5

Mientras E tabata papiando ainda, atá, un nubia di luz a sombra nan, y atá, un boz fo'i den e nubia cu tabata bisa: Esaki ta Mi Yiu stimá den Ken Mi tin Mi gozo; tend'E.

## JESUS TA BISA NOS TA KEN E TA

San Juan 8:23

Y El a bisa nan: Bosonan ta djaki bao; ma Ami ta djariba; boso ta dje mundu aki, ma Ami no.

San Juan 13:13

Boso ta yamáMi Maestro y Señor y boso ta hacié cu razon, pasobra asina Mi ta.

San Juan 8:58

Jesus a bisa nan: Di berdad, di berdad Mi ta bisa boso, promé cu Abraham tabata, Ami ta.

San Juan 9:5

Mientras cu Mi ta den mundu, Mi ta e luz di mundu.

San Juan 6:35

Jesus a bisa nan: Ami ta e pan di bida; esun cu bini cerca Mi lo no haña hamber nunca; y esun cu kere den Mi lo no haña sedu nunca.

San Juan 11:25

Jesus a bis'é: Ami ta e resureccion y e bida, esun cu kere den Mi, maske é ta morto, lo é biba.

San Juan 10:7

Jesus anto a bolbe bisa nan: Di berdad, di berdad Mi ta bisa boso, Ami ta e porta dje carnénan.

## ALGUN MILAGERNAN CU JESUS A HACI

San Mateo 14:19-21

Y El a manda e hendenan sinta abao riba yerba, y tumando e cinco pan y e dos piscá, y halzando Su wowo na cielu, El a bendiciona nan; y despues cu El a kibra nan, El a duna nan na Su discipelnan, y e discipelnan a duna nan na e hendenan. Y tur a come barica yen; y nan a recoge loke a sobra dje pidanan, y tabatin diezdos macutu yen. Y esnan cu a come, tabata como cinco mil homber sin conta muher-nan y muchanan.

San Mateo 20:30 y 34

Y atá, dos hende ciegu sintá na cantu di caminda; ora nan a tende cu Jesus tabata pasa, nan tabata grita, bisando: Señor, Yiu di David, tene misericordia di nos. . . Y Jesus a tene misericordia di nan y a toca nan wowo, y mes ora nan a haña nan bista y nan a siguiE.

San Lucas 5:5-7

Y Simon a rosponde y a bis'E: Maestro, nos a traha henter anochi y no a coge nada; ma riba Bo palabra lo mi tira e reda. Y ora nan a haci esey, nan a coge hopi piscá y nan reda a kibra. Y nan a yama nan compañeronan, cu tabata den e otro boto pa nan bin yuda nan, y nan a bin. Y nan a yena tur dos boto, cu nan a hera zink.

## JESU-CRISTO TA CREADOR Y SEÑOR

Colosensenan 1:16

Pasobra den djE a wordu creá tur loke ta den cielu y riba tera, cu hende por mira y cu hende no por mira, sea ta trono, sea gobierno, sea potencia, sea poder; tur cos a wordu creá pa medio di djE y p'E.

Hebreonan 1:1,2

Dios . . . a papia cu nos den ultimo dianan aki pa medio di Su Yiu, ken El a nombra como eredero di tur cos, pa medio di Ken El a crea e mundu tambe.

San Juan 1:3

Tur cos a wordu trahá pa medio di djE, y sin E, nada di loke ta trahá, tabata trahá.

1 Corintionan 1:9

Dios ta fiel, pa kende boso ta yamá na e comunión cu Su Yiu Jesu-Cristo, nos Señor.

Echunan 2:36

Asina cu tur hende di Israel por sabi sigur, cu Dios a haciE Señor y Cristo, cu ta Jesus cu boso a crucifica.

Romanonan 14:9

Pasobra p'esey Cristo a muri y a resucita di mortonan, y a bolbe biba pa reina riba e morto y e bibunan.



## JESU-CRISTO TA HUEZ DI TUR

San Mateo 25:32

Y tur nacion lo wordu trecí Su dilanti; y lo E separa nan un fo'i otro, manera un wardador ta separa carné fo'i chubatu.

San Juan 5:22

Pasobra e Tata no ta huzga ningun hende, ma El a laga tur huzgamentu p'e Yiu.

2 Timoteo 4:1

Mi ta hurábo dilanti Dios y Señor Jesu-Cristo, Ken lo huzga e bibu y e mortonan, tempu di Su manifestacion y Su reino.

Romanonan 2:16

Den e dia cu Dios lo huzga e secretunan di hende pa medio di Jesu-Cristo, segun mi evangelio.

Romanonan 14:10

Ma abó, pakico bo ta huzga bo ruman? O, abó tambe, pakico bo ta desprecia bo ruman? Pasobra nos tur lo tin di parce dilanti tribunal di Cristo.

Echunan 10:42

Y El a manda nos predica na e puebel y duna testimonio, cu E ta esun cu Dios a ordena como Huez di bibu y mortonan.

## REDENCION SOLAMENTE PA MEDIO DI CRISTO

San Juan 10:9

Ami ta e porta; esun cu drenta pa medio di Mi, ta salvá; y lo drenta y sali y lo haña yerba pa come.

San Juan 14:6

Jesus a bis'é: Ami ta e caminda, berdad y bida; ningun ta bini cerca e Tata sino pa medio di Mi.

Hebreonan 5:9

Y siendo hací perfecto, El a bira autor di salvacion eterna pa tur esnan cu ta obedec'E.

Echunan 4:12

Y no tin salvacion den ningun otro, pasobra no tin bao cielu ningun otro nomber tampoco, cu ta duná na hende, pa cua nos mester wordu salvá.

Hebreonan 7:25

P'esey tambe E por salba esnan completamente cu ta bini cerca Dios pa medio di djE; como E ta biba semper pa defende nan asuntunan.

San Juan 8:24

P'esey Mi ta bisa boso; cu den boso picá lo boso muri; pasobra si boso no kere cu Mi ta E, den boso picá lo boso muri.

## **REDENCION SOLAMENTE PA MEDIO DI CRISTO**

**Tito 2:14**

Cu a duna Su mes pa nos, pa E libra nos di tur maldad, y purifica pa E mes un puebel cu ta di djE, mashá activo den hacimentu di bon obra.

**San Lucas 19:10**

Pasobra e Yiu di Hende a bin pa busca y salba loke tabata perdí.

**1 Corintionan 1:30**

Pasobra ta di djE (Dios), cu boso ta den Cristo Jesus, cu a bira pa nos sabiduria di Dios, y husticia, y santificacion y salvacion.

**Rebelacion 5:9**

Y nan tabata canta un cantica nobo, bisando: Bo ta digno di tuma e buki y habri su seyonan; pasobra Bo a wordu matá, y Bo a cumpra pa Dios cu Bo sanger fo'i tur generacion, y lenga y puebel y nacion.

**Colosensenan 1:12-14**

Dunando gradicimentu na e Tata, cu a haci boso competente pa tuma parti den e erencia dje santunan den luz; cu a libra nos di poder di scuridad, y a pasa nos na e reino dje Yiu di Su stimacion, den Ken nos tin salvacion pa medio di Su sanger, esta: pordon di picánan.

## RECONCILIACION PA E SANGER DI CRISTO

Romanonan 5:9

Muchu mas awor anto, cu nos ta hustificá pa medio di Su sanger, nos lo wordu salvá dje rabia pa Su via.

1 Pedro 1:18,19

Sabiendo, cu no ta cu cosnan cu ta caba, sea plata ó oro, boso a wordu librá di boso manera-nan banu di biba, cu boso a ereda di boso tata-nan, ma pa medio dje sanger precioso di Cristo, como djun Lamchi sin culpa y sin mancha.

Efesionan 1:7

Den Ken nos tin salvacion pa medio di Su sanger; esta, pordon di picánan segun rikeza di Su gracia.

Hebreonan 9:14

Cuanto mas e sanger di Cristo, cu pa medio di Spiritu Eterno, a ofrece Su mes sin mancha na Dios, lo limpia boso concenshinan dje obra mortonan, pa boso sirbi Dios bibu?

1 Juan 1:7

Ma si nos ta camna den luz, mescos cu E ta den luz, anto nos tin comunion cu otro, y sanger di Jesu-Cristo, Su Yiu, ta purifica nos di tur picá.

## **SALBACION PA MEDIO DI FE DEN CRISTO**

**Efesionan 2:8,9**

Pasobra pa gracia boso ta salbá pa medio di fe, y esaki no ta bini fo'i boso; pasobra e ta don di Dios. E no ta bini di obranan, pa ningun hende no gaba.

**Romanonan 5:1**

Nos anto, hustificá pa fe, a haña paz cerca Dios pa medio di nos Señor Jesu-Cristo.

**Galationan 5:6**

Pasobra den Cristo Jesus, ni circuncision ni incircuncision no bal nada; ma fe, cu ta obra pa medio di stimacion.

**1 Juan 5:4**

Pasobra tur loke ta nací fo'i Dios, ta vence mundu; y esaki ta e victoria cu ta vence mundu: nos fe.

**San Juan 20:31**

Ma esakinan ta scirbí, pa boso kere cu Jesus ta e Cristo, e Yiu di Dios; y keriendo, lo boso tin bida den Su nomber.

**San Juan 6:28,29**

Nan a bis'é anto: Kico lo nos haci, pa nos por obra loke Dios ta gusta? Jesus a responde nan: Esaki ta e obra di Dios, pa boso kere den Esun cu El a manda.

## MISERICORDIA DI DIOS

### Salmo 103:11

Pasobra mes haltu cu cielu ta riba tera, asina grandi tambe Su misericordia ta pa esnan cu ta tem'E.

### Salmo 103:17

Ma misericordia di Jehová ta keda pa semper ariba esnan cu ta tem'E, y Su husticia na yiunan di yiunan.

### Mikeas 7:18

Ken ta un Dios manera Abo cu ta pordona inikidad y cu no ta haci caso cu e acto rebeldu di e remnante di Su posesion? E no ta retene Su rabia pa semper, pasobra Su gusto ta den misericordia.

### Salmo 108:4

Pasobra Bo misericordia ta grandi riba cielnan, y Bo berdad te den nubianan.

### Lamentacionnan 3:22,23

E ta di e misericordianan di Jehová cu nos no ta consumí, pasobra Su compasionnan no ta falta. Nan ta nobo cada mainta. Grandi ta Bo fieldad.

### Tito 3:5

El a salba nos, no pa causa dje obranan di husticia cu nos a haci, ma pa Su misericordia, pa medio di e bañu di regeneracion y renobamentu di Spiritu Santu.

## DIOS TA INVITA NOS BINI CERCA DJE

San Mateo 11:28,29

Bini cerca Mi, tur cu ta cansá y cargá, y lo Mi duna boso descanso. Tuma Mi yugo riba boso y siña di Mi, cu Mi ta mansu y umildu di curazon; y lo boso haña descanso pa boso alma.

Isaias 55:1

Bam mira! Tur cu tin sed, bini na e awanan, y esnan cu no tin placa; bini, cumpra y come; sí, bini, cumpra biña y lechi sin placa y sin prijs.

San Juan 7:37

Ariba e ultimo dia, e dia grandi dje fiesta, Jesus tabata para y bisa cu boz duru: Si algun tin sedu, bini cerca Mi y bebe.

Rebelacion 22:17

Y e Spiritu y e Bruid ta bisa: Bini! Y esun cu ta tend'E, lag'é bisa: Bini! Y esun cu tin sedu, lag'é bini, y esun cu ke, tuma e awa di bida gratis.

Isaias 1:18

Bini awor, y laga nos razona huntu, Jehová ta bisa; maske boso picánan ta manera scarlata, nan lo ta blancu manera sneeuw; maske nan ta corá manera carmesi, nan lo ta manera lana blancu.

## TUR HENDE NO TA YIUNAN DI DIOS

### 1 Juan 3:10

Cu esaki e yiunan di Dios y e yiunan di diabel ta conocí. Ken cu no ta haci husticia y no stima su ruman, no ta di Dios.

### Romanonan 8:14,15

Pasobra tur esnan cu ta wordu guiá pa Spiritu di Dios, eseynan ta yiu di Dios. Ma boso no a ricibi spiritu di sclabitud pa tin miedu atrobe; ma boso a ricibi e Spiritu pa wordu aceptá como yiu, pa cua nos ta sclama: Abba, Tata!

### Filipensenan 2:15

Pa boso por ta sin culpa y sincero, manera yiunan di Dios, sin mancha, meimei djun raza corcobá y corumpí.

### 2 Corintionan 6:17,18

P'esey sali fo'i meimei nan, y separa boso djeseynan, e Señor ta bisa, y no mishi cu cos cu ta impuru, y lo Mi ricibi boso. Y lo Mi ta Tata pa boso, y boso lo ta yiu hombernan y yiu muhernan pa Mi, e Señor todopoderoso ta bisa.

### San Juan 1:12

Ma tur esnan cu a ricibiE, na nan El a duna poder di bira yiunan di Dios: na esnan cu ta kere den Su nomber.



## **LOKE DIOS TA BISA TOCANTE BEBIDA STERKI**

**Galationan 5:19-21**

Obranan di carni ta cla pa mira, cuanan ta: kibramentu di matrimonio, fornicacion, impureza, bida sin berguenza, adoramentu di dios falsu, venenamentu, enemistad, pleitu, cudishi, rabia, zundramentu, desunion, doctrina falsu, envidia, matamentu, buracheria, parandiamentu, y tur e sorto di cosnan ey, di cuanan mi ta bisa boso padilanti, mescos cu mi a bisa promé caba, cu esnan cu haci e sorto di cosnan ey, lo no ereda reino di Dios.

**Isaias 5:11**

Ay di esnan cu ta lamta tempran mainta, pa nan sigui bebida sterki; cu ta continua te anochi te ora nan bira burachi.

**Romanonan 13:13,14**

Laga nos camna drechi anto mescos cu di dia, no core paranda ni bebe burachi, no den cambernan di drumi pa haci picá, y den scandal, no den pleitu y envidia; ma bisti boso di Señor Jesu-Cristo, y no duna chens na boso carni pa cumpli cu su mal deseonan.

**Proverbionan 23:31,32**

No mira na e biña ora e ta corá, ora e ta duna su color den copa, ora e ta baha suavamente. Na fin e ta morde manera serpiente, y ta pica manera colebra.

## SINCERIDAD NO TA BASTA

San Mateo 22:37,38

Y Jesus dici cu né: Lo bo stima Señor, bo Dios, cu tur bo curazon, y cu tur bo alma, y cu tur bo huicio. Esaki ta e gran y e di promé mandamentu.

San Marco 10:17-22

Y ora E tabata bai riba caminda, un a core cerca djE y a cai na rudia y a puntr'E: Bon Maestro, kico mi mester haci pa mi haña bida eterna? Y Jesus dici cu né: Pakico bo ta yamá-Mi bon? Ningun hende no ta bon, sino Dios só. Bo sabi e mandamentunan: No mata, no kibra matrimonio, no horta, no duna testimonio falsu, no haci ningun sorto di ladronicia, onra bo tata y bo mama. Y el a contest'E: Maestro, tur e cosnan aki mi a warda fo'i tempu di mucha. Y Jesus, ora El a mir'é, El a stim'é y dici cu né: Un cos bo ta falta: bai y bende tur loke bo tin y duna na pobernan y lo bo haña tesoro den cielu, bin y siguiMi. Ma el a sinti duele riba e palabranan aki y el a bai tristu, pasobra é tabatin hopi posesion.

Proverbionan 16:18,25

Orguyo ta bai dilanti destruccion, y un pechu haltu promé cu caida. Tin un caminda cu ta parece bon na hende, pero su fin ta e caminda di morto.

## NO GAÑA BO MES

Efesionan 5:6

No laga ningun hende gaña boso cu palabra banu, pasobra pa causa dje cosnan aki, rabia di Dios ta bini riba yiunan di desobediencia.

1 Corintionan 6:9,10

O boso no sabi, cu inhustunan lo no ereda reino di Dios? No gaña boso mes; ni fornica-dornan, ni adoradornan di dios falsu, ni kibra-dornan di matrimonio, ni homosexualnan, ni hortadornan, ni e golosnan pa mas placa, ni burachénan, ni blasfemadornan, ni piratanan lo no ereda reino di Dios.

Santiago 1:22

Sea anto cumplidor dje Palabra y no scucha-dor só, gañando boso mes.

1 Juan 3:7,8a

Yiunan chikitu, no laga ningun hende gaña boso. Esun cu haci husticia, ta hustu mescos cu E tambe ta hustu. Esun cu haci picá, ta yiu di diabel; pasobra fo'i principio, diabel ta haci picá.

Galationan 6:7

No gaña boso mes. Dios no ta laga ten'E di bofón. Pasobra kico cu hende planta, lo é cosecha tambe.

## PICA TA TRECE MORTO

Romanonan 8:6

Pasobra sabiduria di carni ta morto; ma sabiduria di Spiritu ta bida y paz.

Santiago 1:15

Y e deseo malu, ora el a concibi, e ta pari picá; y picá, ora e ta cumplí, ta produci morto.

Romanonan 5:12

P'esey, mescos cu picá a drenta den mundu pa via di un hende, y pa via di picá, morto; asina morto a pasa na tur hende, pasobra tur a haci picá.

Ezekiel 18:20

E alma cu ta peca, é lo muri. E yiu lo no hiba e picá di su tata, ni tampoco e tata lo no hiba e picá di su yiu; e husticia dje hustu lo keda riba dje, y e malu dje malu lo keda riba dje.

San Lucas 15:32

Hende mester ta contentu y haci fiesta; pasobra bo ruman aki tabata morto y el a rebiba. E tabata perdí y nos a bolbe hañ'é.

Proverbionan 11:19

Manera husticia ta pa bida; asina esun cu ta persigui maldad ta persiguié pa su morto.

## CRISTO A VENCE MORTO

San Lucas 7:14,15a

Y El a yega cerca y a mishí cu e caha di morto y e cargadornan a para, y El a bisa: Hoben, Mi ta bisábo, lamta! Y e morto a lamta sinta, y a cuminza papia.

San Juan 11:43,44

Y despues cu El a papia asina, cu boz grandi El a yama: Lazaro, bini afó! Y e morto a bini afó lorá na man y pia cu paña di graf y cu cara lorá cu un lensu. Jesus a bisa nan: kita e paña di graf fo'i djé y lag'é bai.

San Juan 10:17,18

P'esey e Tata ta stimáMi, pasobra Mi ta duna Mi bida pa bolbe tum'é. Ningun no por tum'é di Mi, ma Mi ta dun'é boluntariamente. Mi tin poder pa dun'é y poder di bolbe tum'é. E mandamentu aki Mi Tata a dunáMi.

Rebelacion 1:17b,18

Ami ta e promé y e ultimo, y Esun cu ta biba. Mi tabata morto, y atá, Mi ta biba di eternidad te na eternidad, y Mi tin e yabinan di fiernu y di morto.

Efesionan 2:1

Y El a duna bida na boso, cu tabata morto pa causa di boso delitunan y picánan.

## MANDAMENTUNAN DI DIOS

Deuteronomio 5:7 . . . 21

Lo bo no tin ningun otro diosnan dilanti di Mi.

Lo bo no traha ningun imagen, ni algun semehanza di cualke cos cu ta ariba den cielu, ni cu ta abao den tera, ni cu ta den e awanan bao di tera. Lo bo no rudia bo mes na nan, ni sirbi nan, pasobra Ami, Jehová bo Dios, ta un Dios cu ta jaloers.

Lo bo no usa number di Jehová bo Dios por nada: pasobra Jehová lo no ten'é sin culpa cu ta usa Su number por nada.

Warda e dia di Sabát pa santificéle, como Jehová bo Dios a mandábo. Seis dia lo bo traha y haci tur bo trabao.

Onra bo tata y bo mama, como Jehová bo Dios a mandábo, cu bo dlanan por ta largu, y cu lo bai bon cu bo den e tera cu Jehová bo Dios ta dunábo.

Lo bo no mata.

Lo bo no comete adulterio.

Lo bo no horta.

Lo bo no duna testimonio falsu contra bo prohimo.

Lo bo no cudisha e casá di bo prohimo; lo bo no desea e cas di bo prohimo, ni su cunucu ni su sirbidor, ni su bestia ni su buricu, ni nada cu ta pertenece na bo prohimo.

## NI UN NO POR SCONDE DI DIOS

Job 34:21,22

Pasobra Su wowonan ta riba e camindanan di hende, y E ta mira tur su pasonan. No tin scuridad ni sombra di morto, caminda e hacidor-nan di maldad por sconde nan mes.

Salmo 139:8 y 12

Si mi subi na cielu, Bo ta ayá: y si mi pone mi cama den Sheol, atá, Bo ta ayá. Asta scuridad no ta tapa nada pa Bo. Anochi ta briya cla mescos cu dia; scuridad y luz ta mescos pa Bo.

Jeremias 23:24

Algun por sconde su mes den lugarnan secretu cu Mi no por mir'é! a bisa Jehová. Ami no ta yena cielu y tera! a bisa Jehová.

Proverbionan 15:3

E wowonan di Jehová ta tur caminda, mirando malu y bon.

San Lucas 8:17

Pasobra no tin ningun cos scondí, cu lo no wordu manifestá, y nada secretu, cu hende lo no haña sa y bini na claridad.

Hebreonan 4:13

No tin ningun criatura invisibel p'E, ma tur cos ta sunú y habrí dilanti wowonan di Esun cu Ken nos tin cu haci.

## CONDENACION ETERNAL PA ESNAN SIN DIOS

San Mateo 13:41,42

E Yiu di Hende lo manda Su angelnan y nan lo piki fo'i Su reino tur e tentadornan y e haci-dornan di inhusticia; pa tira nan den fornu di candela. Ayá lo tin yoramentu y mordementu riba djente.

San Mateo 18:8

Si encaso anto bo man ó bo pia ta motibu pa bo haci picá, corta nan y tira nan fo'i bo. Ta mehor pa bo dreña bida coho ó mutilá, cu teniendo dos man ó dos pia y wordu tirá den candela eternu.

2 Pedro 3:7

Ma e cielunan y tera di awor, pa medio di Su palabra ta reserbá pa candela, wardá pa e dia di huicio y di perdicion dje hendenan cu ta biba sin Dios.

Salmo 9:17

E malbadonan lo wordu halá atras na fiernu (sheol) y tur e nacionnan cu ta lubida Dios.

San Mateo 25:46

Y esakinan lo bai den pena eternu, y e hustu-nan lo dreña den bida eternu.

2 Tesalonicensenan 1:9

Cuanan lo haña perdicion eternu pa castigu, dilanti cara di Señor y dje gloria di Su poder.



## HUICIO TA BINI

Echunan 17:31

Pa e motibu ey, El a fiha un dia riba cua lo  
E huzga henter mundu cu husticia pa medio di  
un homber cu El a destina p'esey; dunando  
siguranza djesey na tur pa motibu cu El a  
lamt'E fo'i mortonan.

2 Pedro 2:9

Asina e Señor sabi di libra e debotonan fo'i  
tentacion y di reserba e inhustunan pa wordu  
castigá e dia di huicio.

1 Juan 4:17

Den esaki stimacion a bira perfecto den nos,  
pa nos por tin confianza den e dia di huicio; pa  
mescos cu E ta, nos tambe por ta den e  
mundu aki.

Hebreonan 9:27

Y mescos cu ta poní pa hende muri blo un  
bez só, y despues ta sigui huicio.

2 Corintionan 5:10

Pasobra ta di necesidad cu nos tur parce  
dilanti tribunal di Cristo, pa cada un por ricibi  
su parti, conforme loke el a haci tempu e tabata  
den su curpa, sea bon ó malu.

Romanonan 14:12

Di manera cu cada un di nos lo duna cuenta  
di su mes na Dios.

## E GRACIA DI JESU-CRISTO

Romanonan 5:15

Ma e don di gracia no ta mescos cu e delitu. Pasobra si pa delitu di un, hopi a muri, asina muchu mas abundante e gracia di Dios, y e don pa medio di gracia, cua ta di un hende só, Jesu-Cristo, a abunda na hopi.

Romanonan 9:16

Asina no ta djesun cu ke, ni djesun cu ta core, sino di Dios, cu tin misericordia.

1 Pedro 5:5b

Dios ta resisti contra e soberbenan, ma na e umildunan E ta duna gracia.

2 Corintionan 8:9

Pasobra ya boso sabi e gracia di nos Señor Jesu-Cristo, cu siendo ricu, El a bira pober pa stimacion pa boso, afin cu boso por a bira ricu pa medio di Su pobreza.

2 Corintionan 9:15

Gracia na Dios pa Su don inexplicabel.

Echunan 4:33

Y cu poder grandi e apostelnan tabata duna testimonio di resureccion di Señor Jesus, y tabatin gracia grandi riba nan tur.

Tito 3:7

Pa nos, siendo hustificá pa medio di Su gracia, por bira eredero segun speranza di bida eterna.

## RIPINTIMENTU

Echunan 17:30

Y Dios, sin haci caso di e tempunan di ignorancia, awor ta manda tur hende, y na tur parti, pa nan ripinti.

San Lucas 13:3

Mi ta bisa boso, no; ma si boso no ripinti, boso tur lo perece dje mes manera.

Echunan 3:19

Aripinti boso anto y comberti boso, pa boso picá por wordu pordoná, y pa tempunan di refrescamentu por bini fo'i presencia di Señor.

Echunan 2:38

Y Pedro a bisa nan: Aripinti boso y laga cada un di boso wordu batizá den nomber di Jesu-Cristo pa pordon di picánan, y boso lo ricibi e don di Spiritu Santu.

2 Corintionan 7:10

Pasobra tristeza cu ta segun Dios, ta obra un ripintimentu pa salvacion, di cua ningun hende nunca sa ripinti nan; ma tristeza di mundu ta obra morto.

San Mateo 3:1,2

Y den e dlanan ey, Juan Bautista a bini predicando den desierto di Judea bisando: aripinti boso, pasobra reino di cielunan ta cerca.

## PORDON DI PICANAN

San Mateo 6:14

Pasobra si boso pardona hende nan ofensan, boso Tata celestial lo pardona boso tambe.

Ezekiel 18:21

Pero si e malbadonan lo bira fo'i tur su picánan cu el a comete, y warda tur Mi statuutnan, y haci loke ta segun ley y hustu, siguramente lo é biba; é lo no muri.

Isaias 55:7

Laga e malbado bandona su caminda, y e inhustu su pensamentunan; y lag'é bolbe na Jehová, y lo E tene misericordia riba djé, y na nos Dios, pasobra E lo pardona abundantamente.

Echunan 5:31

Esaki, e Guiador di bida, e Salvador, Dios a halza den gloria na Su man drechi, pa duna na Israel aripintimentu y pordon di picá.

San Marco 2:5

Y Jesus, mirando nan fe, a bisa na e paralitico: Mi yiu, bo picánan ta pardona.

Efesionan 4:32

Ma boso, un sea cu otro, bondadoso, misericordioso, pordonando otro, mescos cu Dios tambe a pardona boso den Cristo.

## SEPARACION FO'I COSNAN MUNDUNAL

Tito 2:11,12

Pasobra e gracia di Dios cu ta trece salvacion, a parce na tur hende, y ta siña nos pa nos renuncia e manera di bida sin Dios y pasion mundunal; pa nos biba modera y hustu y deboto den e mundu aki.

Colosensenan 3:2

Pone boso curazonnan den e cosnan cu ta djariba, no den nan cu ta djaki bao.

Efesionan 5:11

Y no tuma parti den e obranan di scuridad cu no ta duna fruta, ma al contrario condena nan.

Isaias 1:16

Laba y haci boso mes limpi; kita e malu di boso obranan for di Mi bista. Stop di haci malu.

1 Juan 2:15,16

No stima mundu, ni loke ta den mundu; ken cu ta stima mundu, e stimacion pa e Tata no ta den dje. Pasobra tur loke ta den mundu; deseonan di carni, y deseonan di wowo, y grandeza di bida, no ta bini dje Tata, ma di mundu.

Santiago 4:4

Boso no sabi cu amistad di mundu ta enemistad cu Dios? Ken anto cu ke ta amigo di mundu, ta bira enemigo di Dios.

## E NACEMENTU DI NOBO

Ezekiel 36:26

Un curazon nobo tambe lo Mi duna boso, y un spiritu nobo lo Mi pone den boso; y lo Mi kita e curazon di piedra for di boso carni, y lo Mi duna boso un curazon di carni.

1 Juan 2:29

Si boso sabi cu E ta hustu, anto boso sabi cu ken cu haci husticia, a nace fo'i djE.

2 Corintionan 5:17

Di manera si algun hende ta den Cristo, ta un criatura nobo e ta. Loke ta bieu a pasa caba; y atá, tur cos a bira nobo.

1 Juan 5:18

Nos sabi, cu esnan cu a nace di Dios, no ta haci picá; pasobra Esun cu a nace di Dios ta ward'éle y e malu no por mishi cu né.

San Juan 3:3

Y Jesus a rospond'é asina: Di berdad, di berdad, Mi ta bisábo, cu esun cu no bolbe nace, no por mira e reino di Dios.

1 Pedro 1:23

Boso cu a bolbe nace di nobo, no di simiña cu ta caba, ma di simiña cu no ta caba nunca, pa medio dje Palabra di Dios bibu, cu ta permanece eternamente.

## MORTO PA PICA - RESUCITA DEN CRISTO

Efesionan 2:1 y 6

Y El a duna bida na boso cu tabata morto pa causa di boso delitunan y picánan. Y cu nE El a resucita nos, y El a haci nos sinta den cielnan den Jesu-Cristo.

Colosensenan 3:1 y 3

P'esey si boso a resucita cu Cristo, anto busca e cosnan cu ta djariba, unda Cristo ta sintá na man drechi di Dios. Pasobra boso a muri, y boso bida ta scondí cu Cristo den Dios.

1 Pedro 2:24

E mes a carga nos picánan den Su curpa riba cruz, pa nos, librá di picá, por biba pa husticia, y pa medio di Su cortanan boso a wordu curá.

Galationan 5:24,25

Ma esnan cu ta di Cristo, ya nan a crucificá carni caba cu tur su bicionan y mal deseonan. Si nos ta biba segun Spiritu, anto laga nos camna tambe segun Spiritu.

Romanonan 6:2 y 11

Nos, cu ta morto pa picá, con lo nos biba ainda den dje mas? Asina boso tambe, bini na conclusion, cu boso ta morto, sí, pa via di picá, pero bibu pa Dios den nos Señor Jesu-Cristo.

## BIDA ETERNA

Galationan 6:8

Pasobra esun cu planta den su mes carni, lo cosecha loke ta dañá fo'i carni tambe; ma esun cu planta den Spiritu, lo cosecha bida eterna fo'i Spiritu.

San Juan 3:14,15

Y mescos cu Moses a halza e colebra den desierto, asina tambe e Yiu di Hende mester wordu halzá, pa tur esnan cu kere den djE, no bai perdí, ma haña bida eterna.

San Juan 17:3

Y esaki ta e bida eterna: cu nan conocéBo, e unico Dios berdaderu, y Jesu-Cristo, Kende Bo a manda.

San Juan 3:36

Esun cu kere den e Yiu, tin bida eterna; ma esun cu desobedece e Yiu, esey lo no mira e bida, ma e rabia di Dios lo keda riba dje.

Romanonan 6:23

Pasobra pagu di picá ta morto; ma e don di gracia di Dios ta bida eterna den Cristo Jesus, nos Señor.

San Juan 5:24

Di berdad, di berdad, Mi ta bisa boso; esun cu tende Mi palabra y kere Esun cu a mandáMi, esey tin bida eterna y no ta bin na condenacion ma el a pasa fo'i morto den bida.



## SIGURANZA DI SALBACION

Isaias 32:17

E obra di husticia lo ta paz, y e sirbishi di husticia, trankilidad y siguranza pa semper.

Galationan 4:6

Y pasobra boso ta yiunan, Dios a manda den boso curazonnan e Spiritu di Su Yiu, cua ta sclama: Abba, Tata!

San Juan 14:21

Esun cu tin Mi mandamentunan y ta warda nan, esun ey ta stimáMi, y esun cu ta stimáMi, lo wordu stimá pa Mi Tata, y Ami lo stim'é y lo Mi manifesta Mi mes na né.

Romanonan 8:16

E mes Spiritu aki ta duna testimonio huntu cu nos spiritu, cu nos ta yiu di Dios.

1 Juan 3:18,19

Mi yiunan chikitu, no laga nos stima cu palabra ni cu lenga só, ma cu accion y cu berdad. Y cu esaki nos lo reconoce cu nos ta yiu di berdad, y nos lo tin un curazon trankil dilanti djE.

1 Juan 4:13

Cu esaki nos sabi cu nos ta permanece den djE, y E den nos, pasobra El a duna nos di Su Spiritu.

## **CRISTO DEN BIDA TA DUNA GOZO**

**San Juan 17:13**

Ma awor Mi ta bini cerca Bo; y e cosnan aki Mi ta papia den mundu, pa nan tin Mi gozo completamente den nan mes.

**Romanonan 14:17**

Pasobra reino di Dios no ta cuminda ni bebida, ma e ta husticia y paz y alegria den Spiritu Santu.

**Galationan 2:20**

Mi a wordu crucificá cu Cristo, y sinembargo mi ta biba; ma no mi mes mas, ma Cristo ta esun cu ta biba den mi; y e bida cu awor mi ta hiba den carni, esey mi ta biba pa medio di fe den e Yiu di Dios, cu a stimámi y a entrega Su mes pa mi.

**Isaias 12:3**

P'esey cu gozo lo boso saca awa for di e fuentenan di salvacion.

**San Juan 15:11**

E cosnan aki Mi ta papia cu boso, pa Mi alegria sea den boso y boso alegria sea completu.

**Salmo 16:11**

Lo Bo munstrámi e caminda di bida: den Bo presencia tin abundancia di alegria; na Bo man drechi tin delicianan pa semper.

## OBEDIENCIA NA SEÑOR TA NECESARIO

1 Samuel 12:15

Pero si boso lo no scucha bos di Jehová, pero keda rebelde contra mandamentu di Jehová, anto e man di Jehová lo ta contra boso, manera e tabata contra boso tatanan.

Romanonan 6:16

O boso no sabi anto, cu na ken cu boso presenta boso mes como catibu pa obedecéle, boso ta catibu djesun na ken boso ta obedece; di picá pa morto, ó di obediencia pa husticia?

2 Tesalonicensenan 1:7-9

Y alivia boso cu a wordu maltratá, y nos tambe, ora e Señor Jesus lo wordu rebelá fo'i cielu cu Su angelnan poderoso den vlam di candela, pa duna pagu merecí na esnan cu no conoce Dios y esnan cu no ta obedece evangelio di nos Señor Jesu-Cristo; cuanan lo haña perdicion eterna pa castigu, separá fo'i presencia di Señor y dje gloria di Su poder.

Deuteronomio 11:26-28a

Mira, mi ta pone boso dilanti awé un bendicion y un maldicion: bendicion si boso scucha e mandamentunan di Jehová boso Dios, cua mi ta duna boso awé, y maldicion si boso lo no scucha e mandamentunan di Jehová boso Dios.

## CONFESION DI CRISTO TA NECESARIO

Filipensenan 2:10,11

Cu pa number di Jesus tur rudia lo dobra, djenan cu ta den cielu, y djenan riba tera, y djenan cu ta bao tera; y tur lenga lo confesa cu Jesu-Cristo ta e Señor, pa gloria di Dios e Tata.

San Mateo 10:32,33

Ken cu lo confesáMi dilanti hende, esey lo Mi confesa tambe dilanti Mi Tata cu ta na cielu. Ma ken cu lo nengáMi dilanti hende, esey lo Mi nenga tambe dilanti Mi Tata cu ta na cielu.

Romanonan 10:9,10

Si bo confesa Señor Jesus cu bo boca y kere den bo curazon cu Dios a lamt'E fo'i mortonan, lo bo ta salvá; pasobra cu curazon hende ta kere pa haña husticia, y cu boca hende ta haci confesion pa haña salvacion.

1 Juan 2:23

Ken cu nenga e Yiu, é no tin e Tata tampoco; pero esun cu ta confesa e Yiu, tin e Tata tambe.

San Lucas 9:26

Pasobra esun cu tin berguenza di Mi y di Mi palabranan, di esey e Yiu di hende lo tin berguenza, ora E bini den Su gloria y den gloria di Su Tata y dje angelnan santu.

## **SATANAS - NOS ENEMIGO PRINCIPAL**

**1 Pedro 5:8**

Sea cu wowo cla y vigila, pasobra boso contrapartida, e diabel, ta camna rond mescos cu un leon cu ta gruña, buscando ken é por traga.

**San Mateo 4:1 y 10,11**

Anto Jesus a wordu hibá den desierto pa Spiritu, pa E wordu tentá pa diabel . . . Anto Jesus dici cu né: Bai, Satanas; pasobra ta scirbí: Lo bo adora e Señor bo Dios, y E só lo bo sirbi. Anto diabel a lag'E, y atá, angelnan a yega y nan tabata sirbiE.

**2 Tesalonicensenan 2:9**

Esun, ken su binida ta segun obra di Satanas cu tur poder y señal y milagernan di mentira.

**Efesionan 6:11**

Bisti boso completu cu bistí di guera di Dios, pa boso por para firme contra trampanan di diabel.

**Echunan 26:18**

Pa habri nan wowonan, pa nan comberti nan fo'i scuridad na luz, y di poder di Satanas na Dios; pa nan por haña pordon di picánan, y un erencia cu esnan cu ta santificá pa medio di fe den Mi.

**2 Corintionan 2:11**

Pa nos no cai den poder di Satanas, pasobra su plannan no ta desconocí pa nos.

## VICTORIA RIBA SATANAS

### 2 Tesalonicensenan 2:8

Y e ora ey, e malbado ey lo wordu rebelá, cua e Señor lo mata cu rosea di Su boca, y lo distribi cu resplandor di Su binida.

### Santiago 4:7,8a

Somete boso anto na Dios. Resisti contra diabel y lo é hui di boso. Hala cerca Dios y lo E yega cerca boso.

### Hebreonan 2:14

Asina anto, como e yiunan ta di carni y sanger, anto E tambe a tuma parti di igual manera den e mes cosnan ey; pa E, pa medio di Su morto por distribi cu esun cu tabatin poder riba morto, es ta, diabel.

### Romanonan 8:35 y 37

Ken lo separa nos di amor di Cristo? Calamidad, ó anshedad, ó persiguimentu, ó hamber, ó desnudez, ó peligro, ó spada? . . . Ma mas bien, den tur e cosnan aki nos ta mas cu vencedornan, pa medio di Esun cu a stima nos.

### 1 Juan 3:8

Esun cu practica picá, ta yiu di diabel; pasobra for di principio diabel ta haci picá. P'esey e Yiu di Dios a parce, pa E derota e obranan di diabel.

## STIMACION – E MARCA DI UN SIGUIDOR

1 Juan 4:20

Ken cu bisa: Mi ta stima Dios, y ta aborece su ruman, ta un gañador; pasobra ken cu no ta stima su ruman cu el a mira, con e por stima Dios cu é no a mira?

1 Corintionan 13:1

Maske mi por a papia cu lenga di hende y di angelnan, y mi no tin stimacion, lo mi a bira mescos cu trompet cu ta zona, ó klok cu ta bati.

San Juan 13:35

Den esey tur lo mira cu boso ta Mi discipelnan, si boso tin amor uno pa otro.

Galationan 5:22

Ma fruta di Spiritu ta: stimacion, alegria, paz, grandeza di animo, piedad, bondad, fieldad, suavidad di curazon, decencia.

San Juan 21:16

El a bolbe bis'é pa segundo bez: Simon, yiu di Jona, bo ta stimáMi? El a bis'é: Si Señor, bo sabi cu mi ta stimáBo. El a bis'é: Warda Mi carnenan.

1 Juan 3:14

Nos sabi cu nos a pasa fo'i morto na bida, pasobra nos ta stima nos rumannan. Ken cu no stima, ta permanece den morto.

## RESURECCION DI JESU-CRISTO

Echunan 10:39-41

Y nos ta testigu di tur loke El a haci den tera di Judiunan y tambe na Jerusalem; ma nan a mat'E, colgando E na palu di cruz. Esaki Dios a resucita pa di tres dia y a present'Ele claramente; no pa tur hende, ma pa e testigunan cu a wordu scogí padilanti pa Dios, es ta, nos cu a come y a bebe cu nE, despues cu El a lamta fo'i morto.

Romanonan 4:25

Kende a wordu entregá pa nos picánan y resucita pa nos hustificacion.

San Juan 20:26-28

Y ocho dia despues, Su discipelnan a reuni huntu atrobe y Thomas cu nan. Y cu portanan cerá, Jesus a drencia y a para meimei y a bisa: Paz sea cu bosonan. Anto El a bisa Thomas: Trece bo dede aki y mira Mi mannan y trece bo man y hinc'é den Mi custia y no sea incredulo ma kere. Y Thomas a rosponde y a bis'E: Mi Señor y mi Dios!

San Marco 16:9

Y ora Jesus a resucita tempran riba e promé dia di siman, El a parce promé na Maria Magdalena, fo'i cua El a saca siete demoño.



## RESURECCION - NOS SPERANZA GLORIOSO

San Mateo 16:21

Dje tempu ey, Jesus a cuminza muntra Su discipelnan cu E tabatin mesté di bai Jerusalem y padece muchu cos dje ancianunan, dje cabez-antenan di sacerdotenan, y dje escribanan, y wordu matá y wordu lamtá di tres dia.

San Juan 5:25 y 28,29

Di berdad, di berdad, Mi ta bisa boso: e ora ta bini y ta awor, cu mortonan lo tende boz di Yiu di Dios, y esunnan cu tend'E lo biba . . . No straña boso riba esaki, pasobra e ora ta bini den cua tur cu ta den graf, lo tende Su boz, y lo sali; esunnan cu a haci bon pa resureccion di bida, y esunnan cu a haci malu pa resureccion di condenacion.

Romanonan 6:3-5 y 11

O boso no sabi anto, cu nos tur cu ta batizá den Cristo Jesus, ta batizá den Su morto? Nos ta derá anto huntu cu nE den morto pa medio di bautismo, pa mescos cu Cristo a lamta di mortonan pa gloria dje Tata, asina tambe lo nos camna den nobedad di bida. Pasobra si nos a bira un planchi huntu cu nE den parcementu di Su morto; anto lo nos ta tambe unu cu nE den Su resureccion . . . Asina boso tambe bini na conclusion cu boso ta morto, sí, pa via di picá, pero bibu pa Dios den Señor Jesu-Cristo.

## SANTIDAD NA DIOS

San Lucas 1:74,75

Pa nos, salbá fo'i man di nos enemigonan y sin miedu, por sirbiE den santidad y husticia Su dilanti, tur e dianan di nos bida.

2 Corintionan 7:1

Teniendo anto e promesanan aki, stimánan, laga nos purifica nos mes di tur impureza di carni y di spiritu, haciendo santidad perfectu den temor di Dios.

2 Timoteo 2:21

Si un hende anto purific'éle dje cosnan aki, lo é ta un wea pa onor, santificá y util pa sirbishi di Señor, prepará pa tur bon obra.

1 Pedro 1:2

Scogínan, cu Dios e Tata a conoce padilanti den santificacion di Spiritu, pa obediencia y pa tin parti den sanger di Jesu-Cristo: Gracia y paz sea multiplicá na boso.

1 Pedro 1:15

Ma mescos cu Esun cu a yama boso ta santu, asina boso sea santu den tur boso accionnan.

Efesionan 1:4

Segun cu El a scoge nos den djE, promé cu fundamentu di mundu, pa nos por ta santu y sin mancha dilanti djE.

## SANTIDAD NA DIOS

Isaias 35:8

Y un caratera lo ta ayá, y un caminda, y e lo wordu yamá, E caminda di santidad. E impuru lo no pasa p'e; pero e lo ta pa esnan cu ta camna e caminda ey, y bobonan lo no vaga riba dje.

Hebreonan 13:12

P'esey Jesus tambe, pa E por a santifica e puebel pa medio di Su mes sanger, a padece pafó dje porta di stad.

1 Juan 1:9

Si nos confesa nos picánan, E ta fiel y hustu pa E perdona nos e picánan y purifica nos di tur inhusticia.

San Mateo 3:11

Ami ta batiza boso cu awa pa ripintimentu; ma Esun cu ta bini despues di mi, ta mas poderoso cu mi, Ken Su sandalia mi no ta digno di carga. Esey lo batiza boso cu Spiritu Santu y candela.

2 Pedro 3:11

Asina anto, cu tur e cosnan aki lo perece, ki sorto di bida santu y deboto lo cunbini boso pa boso hiba.

## HENDENAN YENA DI SPIRITU

San Lucas 11:13

Si boso anto, cu ta malu, sabi di duna boso  
yiunan bon cos, cuanto mas boso Tata celestial  
lo duna e Spiritu Santu na esnan cu lo pidiE.

Echunan 1:8a

Ma boso lo ricibi e poder di Spiritu Santu,  
cu lo bini riba boso, y boso lo ta Mi testigunan.

Ezekiel 36:27

Y lo Mi pone Mi Spiritu den boso, y percura  
pa boso camna den Mi statuutnan, y boso lo  
warda Mi leynan y cumpli cu nan.

Romanonan 8:9

Ma boso no ta segun carni, ma segun Spiritu,  
si ta berdad cu e Spiritu di Dios ta biba den  
boso; y si un hende no tin e Spiritu di Cristo,  
é no ta di djE.

Echunan 13:52

Y e discipelnan a wordu yená cu alegría y  
cu Spiritu Santu.

Echunan 4:31

Y ora nan a caba di haci oracion, e lugar  
caminda nan tabata reuni a tembla, y tur a  
wordu yená cu Spiritu Santu, y tabata papia  
palabra di Dios cu animo y frankeza.

## **PROMESANAN MARAVIOSO PA CRISTIANNAN**

### **Salmo 34:18**

Jehová ta cerca esnan di curazon kibrá; y ta salba esnan di spiritu abatí.

### **Isaias 66:2**

Pasobra tur e cosnan ey, mi man a traha, y ta asina tur e cosnan ey a bini, a bisa Jehová; y na ken lo Mi paga tino, sino na esun cu ta umildu y pober di spiritu, y esun cu ta tembla na Mi palabra.

### **Rebelacion 21:4**

Y Dios lo seca tur lagrima di nan wowo, y lo no tin morto mas, ni tristeza, ni yoramentu, ni dolor lo no tin mas; pasobra e promé cosnan a pasa.

### **Salmo 37:3**

Confia den Jehová y haci bon; biba den e tera y confia Su fieldad.

### **1 Pedro 4:12,13**

Stimánan, no straña ora boso haña boso den candela di persiguimentu, cu boso tin di pasa eyden pa proba boso fe, net manera ta un cos straño ta pasa cu bo; mas bien, alegre boso, cu boso tin parti den sufrimentunan di Cristo, pa boso por salta di gozo y contentu, ora Su gloria lo wordu manifestá.

## PROMESANAN DEN TENTACION

Hebreonan 2:18

Pa motibu cu E mes a wordu tentá den e cosnan cu El a sufri, E por bin na yudanza di esnan cu tambe ta wordu tentá.

Romanonan 16:20a

Y e Dios di paz pronto lo machica Satanas bao boso pianan.

Salmo 34:19

Hopi ta e afliccionnan dje hustu; ma Jehová ta libr'é di nan tur.

Isaias 43:2

Ora bo pasa door dje awanan, lo Mi ta cu bo; y door dje riunan, nan lo no inundábo. Ora bo camna door di candela, lo bo no wordu kimá; ni tampoco e flam lo no cende riba bo.

Romanonan 8:28

Y nos sabi, cu tur cos ta traha huntu na bon exito, pa esnan cu ta stima Dios, es ta, pa esnan cu ta yamá segun Su proposito.

1 Corintionan 10:13

Boso no a pasa ningun tentacion fuera di loke hende por soporta; ma Dios ta fiel, Ken lo no permiti pa boso wordu tentá mas cu boso por wanta; ma lo E traha un manera pa scapa, mes tempu cu tentacion, pa boso por suport'é.

## PROMESANAN NA VENCEDORNAN VENIDERO

### Rebelacion 3:12

Esun cu triunfa, lo Mi hacié un pilar den Tempel di Mi Dios, y lo é no sali nunca mas djeyfó; y lo Mi scirbi number di Mi Dios riba djé, y number dje stad di Mi Dios, cu ta e Jerusalem nobo cu ta baha fo'i cielu di Mi Dios, y lo Mi scirbi riba djé Mi number nobo.

### Rebelacion 3:5

Esun cu triunfa, esey lo wordu bistí cu bistí blancu; y lo Mi no kita su number dje buki di bida, ma sí, lo Mi confesa su number dilanti Mi Tata y dilanti Su angelnan.

### Rebelacion 3:21

Esun cu triunfa, lo Mi hacié sinta cerca Mi den Mi trono, mescos cu Mi tambe a triunfa y ta sintá cu Mi Tata den Su trono.

### Rebelacion 21:7

Esun cu triunfa, lo ereda tur cos, y lo Mi ta un Dios p'é, y lo é ta un yiu pa Mi.

### Rebelacion 2:7

Esun cu tin orea, tende loke e Spiritu ta papia cu e iglesianan; Esun cu triunfa, lo Mi dun'é di come dje palu di bida, cu ta meimei dje Paraiso di Dios.

## LOKE DIOS TA BISA DI DIVORCIO

1 Corintionan 7:10,11

Ma na e casánan, no ta mi sino ta e Señor ta manda, cu e esposa no separa di su esposo; ma si é separa su mes, lag'é keda sin casa ó reconcilia cu su esposo; y cu e esposo no bandona su esposa.

San Lucas 16:18

Ken cu ta, cu bandona su esposa y casa cu un otro, esey ta haci adulterio; y ken cu ta, cu casa cu un mohé rechazá, tambe ta haci adulterio.

Romanonan 7:2,3

Pasobra pa via di ley, un mohé casá ta mará na su esposo mientras esaki ta biba; ma si e esposo muri, anto é ta librá dje ley dje esposo. P'esey si e esposo ta na bida y su esposa bira di otro homber, anto é lo wordu yamá un kibrador di matrimonio; ma si su esposo muri, anto é ta liber dje ley, di manera cu maske é bira di otro homber, lo é no ta un kibrador di matrimonio.

San Mateo 5:32

Ma Mi ta bisa boso, cu esun cu lo divorcia su mohé, sino pa motibu di fornicacion, é ta haci cu e mohé ta comete adulterio, y esun cu casa cu un mohé divorciá, ta comete adulterio.



## **E SEGUNDO BINIDA DI CRISTO**

**San Juan 14:3**

Y si Mi bai y prepara un lugar pa boso, lo Mi bini atrobe y lo Mi tuma boso cerca Mi, pa boso tambe por ta, unda Mi ta.

**Rebelacion 3:11**

Atá, Mi ta bini pronto; warda loke bo tin pa ningun hende no tuma bo corona.

**San Marco 8:38**

Pasobra esun cu tin berguenza di Mi y Mi palabranan den e generacion aki, un generacion di fornicacion y di picá, esey lo ta brongoza pa Yiu di Hende, dia cu E bini den gloria di Su Tata, huntu cu e angelnan santu.

**San Mateo 24:30**

Anto señal di Yiu di Hende lo parce den cielu; y anto tur generacion di mundu lo yora, y lo mira e Yiu di Hende bini riba nubianan di cielu cu poder grandi y gloria.

**Santiago 5:8**

Boso tambe spera cu pacenshi; fortalece boso curazonnan, pasobra binida di Señor ta cerca.

**San Mateo 24:27**

Pasobra manera weerlicht, cu ta sali Pariba y ta lombra te Pabao, asina tambe e binida di Yiu di Hende lo ta.

## E SEGUNDO BINIDA DI CRISTO

1 Juan 3:2

Stimánan, awor nos ta yiu di Dios, y ainda no ta rebelá kico nos lo ta; ma nos sabi, cu ora E wordu manifestá, nos lo ta mescos cu nE; pasobra nos lo mir'E, manera E ta.

Rebelacion 16:15

Atá, Mi ta bini mescos cu ladron. Bendicioná ta esun cu ta keda lamtá, y cu bistí na su curpa, pa é no camna sunú y hende no mira su berguenza.

San Lucas 12:40

Boso anto, sea tambe prepará, pasobra den e ora cu boso no ta spera, e Yiu di Hende ta bini.

Echunan 1:11

Cuanan tabata bisa nan tambe: Hombernan di Galilea, pakico boso ta para mira na cielu? E Jesus aki, cu a wordu tumá fo'i boso den cielu, lo bolbe mescos cu boso a mir'E bai.

San Mateo 16:27

Pasobra e Yiu di Hende lo bini den gloria di Su Tata cu Su angelnan, y anto lo E paga cada un segun su obranan.

San Lucas 21:27

Y e ora ey, nan lo mira e Yiu di Hende bini den un nubia cu hopi poder y gloria.

## **E PALABRA DI DIOS**

**San Lucas 21:33**

Cielu y tera lo pasa, ma Mi Palabra lo no pasa.

**San Mateo 22:29**

Ma Jesus respondiendo, a bisa cu nan: Boso ta kibocá, no sabiendo Escrituranan ni poder di Dios.

**2 Pedro 1:21**

Pasobra promé ayá, profecia no a wordu duná pa boluntad di hende, ma hombernan santu di Dios a papia nan, inspirá pa Spiritu Santu.

**2 Timoteo 3:16**

Tur e Scritura ta duná pa inspiracion di Dios, y ta util pa siñanza, pa reprendementu, pa mehoramentu, pa educa hende den husticia.

**Salmo 119:11**

Bo Palabra mi a sconde den mi curazon, pa mi no peca contra Bo.

**Salmo 119:105**

Bo Palabra ta un lampi pa mi pia, y un luz pa mi caminda.

**2 Timoteo 2:15**

Percura bon, pa bo presentábo como un homber probá dilanti Dios, manera un trahador cu no tin motibu di brongoza su mes, cu ta parti e palabra di berdad na un manera drechi.

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

**World Missionary Press, Inc.  
P.O. Box 120  
New Paris, IN 46553-0120 USA**

Compilá pa Watson Goodman

Gratis — No pa bende